

禮記集說

三

新平知

PDG

禮記集說卷二之一

歸安鄭元慶述

曲禮下第二之二

天子當依而立諸侯北面而見天子曰覲天子當立而立諸公東面諸侯西面曰朝

疏云依狀如屏風以絳爲質高八尺東西當戶牖之間繡爲斧文亦曰斧依門屏之間謂之立 藍田呂氏云此與下節言朝覲會遇聘問盟誓之所以名古者謂相見曰朝相問曰聘臣見於君子見於親賤見於貴皆謂之朝以昏暮別之朝見曰朝暮見曰夕以春秋別之則春見曰朝秋見曰覲然考之舜典二月

東巡狩肆覲東后則春亦曰覲蓋朝覲互名周禮始以春秋別之又有夏宗冬遇以備四時之朝又曰春朝以圖天下之事秋覲以比邦國之功夏宗以陳天下之謨冬遇以協諸侯之慮則四者非獨時異事亦異矣此章天子之立有當依當之別其朝位有諸侯北面及諸公東面諸侯西面之別則朝覲之禮非獨事異儀亦異矣 長樂陳氏云依卽展也之卽著也周禮司几筵凡大朝覲王位設黼依依前南鄉覲禮天子衮冕負斧依明堂位天子負斧依南鄉而立則天子之於朝覲未嘗有當之禮司士正朝儀之位王南鄉三公北面孤東面卿大夫西面朝士掌建

邦外朝之法左九棘孤卿大夫位焉右九棘公侯伯
子男位焉面三槐三公位焉明堂位三公北面諸侯
西面諸伯東面諸子東北面諸男西北面特射人掌
羣臣見王之位諸侯北面焉則諸侯之於朝覲未嘗
有北面之禮 嚴陵方氏云以其一於北面故通謂
之諸侯以其分於東西故有公侯之異稱東面則位
於右西面則位於左 慮氏云康成以爲朝者

位於內朝而序進覲者位於廟門外而序入且言朝
則受摯於朝受享於廟覲則一受之於廟此乃泥於
覲禮之文事畢又肉袒於廟門之東故強立此說
江陵項氏云朝以行禮覲以獻功行禮則異等威辨

儀物盛朝會之禮以示眾庶故君於外而立臣分班而見也獻功則南面而聽治北面而致之故受之於內而一其向也朝者正禮之名覲者主於見而已或以明堂天子當依而諸侯分班遂疑曲禮爲夏殷之制此漢儒遜辭也明堂位不可盡信但當存之以備參考 烏程韓氏云此正天子諸侯相見之名

諸侯未及期相見曰遇相見於卻地曰會諸侯使大夫問於諸侯曰聘約信曰誓涖牲曰盟

註云及至也卻間也涖臨也坎用牲臨而讀其盟書聘禮今存遇會誓盟禮亡 疏云約信者以其不能自和好故用言辭 六相約束以爲信則曰誓盟者殺

牲歃血誓於神也若約束而臨牲則曰盟 藍田呂

氏云會遇聘問誓盟皆諸侯之禮也時有緩遽則儀
有詳畧故會禮詳而遇禮畧也問有大小則文有隆
殺故諸侯使大夫問於諸侯曰聘小聘曰問也誓有
輕重則約有淺深故誓約之淺盟約之深也期而相
見曰會日有期地有所也卻地者竟上之地也其時
緩則禮宜詳也不期而相見曰遇如邂逅適相遇然
日無期地無所其時遽則禮宜畧也久無事曰聘聘
大禮也小聘曰問禮有殺也約信曰誓古者舉大事
以齊眾皆有誓舜征有苗禹誓於師啟伐有扈以誓
於師湯誓泰誓費誓秦誓皆有書 嚴陵方氏云遇

者見而非約故未及期相見曰遇而與周官冬覿之
遇異矣會者衆之所聚故相見於卻地而與周官時
見之會異矣聘言有所與故使大夫問曰聘而與王
制比年之聘異矣蓋冬見之遇時見之會比年之聘
諸侯所以事天子也未及期之遇卻地之會使大夫
之聘諸侯所以交鄰國也此其所以爲異

趙

氏云禮記多漢儒雜說其書出於春秋三傳之後有
援傳而立文者如諸侯未及期相見曰遇彼見春秋
傳釋書遇之說曰遇者不期也而公會衛侯於桃丘
弗遇亦可謂未及期乎又曰相見於卻地曰會彼春
秋之會無常地因曰卻地而會於齊於宋亦卻地乎

況春秋會遇非治世之禮非周禮所謂因朝而會遇者也特侯度不謹時出以謀其私而豈可以春秋會遇爲法 京山郝氏云朝覲聘問之禮記言近之人臣於天子有朝覲而已會遇者諸侯相見之事故儀禮獨有覲而無朝朝卽覲也世儒謂朝宗遇禮今亡周禮春朝夏宗秋覲冬遇若是則終歲奔走無寧日故康成分六服爲六歲侯服一歲至甸服二歲至男服三歲至采服四歲至衛服五歲至要服六歲至至之年各按四時分四方春東夏南秋西冬北一分春朝一分夏宗一分秋覲一分冬遇六歲而六服徧是謂時見曰會也十二年天子有事不巡狩六服皆至

是謂殷見曰同也四時諸侯遣大夫來聘天子是謂
時聘曰問也每元年七年十二年唯侯服來其不來
者皆使大夫聘是謂殷見曰視也周禮近瑱而鄭極
意附會尤瑱謂覲行於廟朝行於朝則是朝廷之上
諸侯終無北面之禮矣人臣見天子自古北面今謂
公西侯東爲班次則可未聞人臣朝君不北面稽首
但門屏間東西相向一立謂之朝者也郊特牲云下
堂而見諸侯天子之失禮由夷王以下豈可爲古禮
乎大抵周衰禮廢諸侯惡害已而去其籍孟子已謂
其詳不可得聞春秋戰國以來諸侯自王古禮墜地
後儒各以臆見補撰非先王之制此記多後人解春

秋例亦非春秋本義也會遇誓盟五霸爲之誓則三代有焉甘誓湯誓牧誓聖王以遏亂非太平盛事也若夫歃血詛盟市井駟僮之約非王公雅道詩云君子屢盟亂是用長春秋之所賤也 烏程韓氏云此諸侯相見之名對上朝覲

諸侯見天子曰臣某侯某其與民言自稱曰寡人

疏云自此至寡君之老明諸侯及臣稱謂之法此謂五等諸侯見天子而擯者將命之辭某侯者若言齊侯下某是名若伯子男則云曹伯許男某也寡人寡德之人 藍田呂氏云臣者君前之稱某侯者所以自別也寡人猶天子稱予一人古者兩君相見及與

臣下言皆自稱曰寡人此云與民言舉其畧也

其在凶服曰適子孤臨祭祀內事曰孝子某侯某外事
曰曾孫某侯某

註云凶服亦謂未除喪祭祀稱國者遠避天子 疏

云適子孤擯者告賓之辭外事謂社稷山川在封內
者天子外事言嗣王某諸侯不得稱嗣侯但稱曾孫
謂是父祖重孫耳 嚴陵方氏云適子孤者以幼而
無父自稱之也然亦或稱曰嗣子某故前經言大夫
士之子不敢自稱曰嗣子某也天子於內事曰孝王
則以國所尊者稱之也諸侯於內事曰孝子則以家
所卑者稱之也

死曰薨復曰某甫復矣

註云薨亦史書策辭某甫舉字

嚴陵方氏云常人

曰皋某復則名之也諸侯曰某甫復則字之也山

陰陸氏云稱死亦言之法

旣葬見天子曰類見言謚曰類

註云旣葬見天子代父受國類猶象也

疏云春秋

之義三年除喪後乃見而今云旣葬者謂天子巡守

至竟故得見天子若未葬未正君臣故雖天子巡守

亦不見也言謚謂將葬就君請謚也謚以表德必由

尊者所裁故將葬之前使人請於天子若檀弓云其

子成請謚於君曰日月有時將葬矣請所以易其名

者是也

王氏云請謚必以其實爲謚類其生

平之行也

長樂陳氏云有事於上帝而非事天之

常禮曰類於上帝有事於社稷宗廟而非祭享之常
禮曰類於社稷宗廟則嗣君之朝王大夫之言謚非
朝聘之常禮謂之類宜矣 廬陵胡氏云周官典命
諸侯之嫡子未誓於天子攝其君朝則以皮帛繼子
男故旣葬見天子亦執皮帛象父見禮也見天子而
請父之謚是能象賢也故曰類 清江劉氏云言謚
曰類當爲誅聲誤耳謂誅而謚之耳

愚按言謚之言疑爲請字脫去偏傍清江劉氏
之說西河先生獨以爲是而曰類誅同音謚曰

類卽諡曰誅也因上有類見類字故下文誤以類作誅請諡曰誅必無疑矣

諸侯使人使於諸侯使者自稱曰寡君之老

疏云玉藻曰上大夫曰下臣擯者曰寡君之老下大夫自名擯者曰寡大夫此云自稱曰寡君之老則上大夫擯者傳辭烏程韓氏云自諸侯見天子至此皆正諸侯之名

天子穆穆諸侯皇皇大夫濟濟士蹕蹕庶人僬僬

註云皆行容止之貌崔氏云凡行容下不得

兼上上得兼下故詩有濟濟辟王穆穆魯侯者詩人頌美舉盛以言非對例也藍田呂氏云穆穆雍容

深厚之貌皇皇莊盛顯明之貌濟濟修飾齊一之貌
蹢蹢翔舉舒揚之貌僬僬趨走促數不爲容止之貌
尊者之容重卑者之容輕尊者之容舒卑者之容遽
烏程韓氏云突出德容一段總上一束

愚按天子臨御諸侯以下見之其容如此而諸
侯之朝也大夫以下見之其容亦當如此庶人
疑指庶人在官者言之非謂百姓也集說以莊
盛爲壯盛誤

天子之妃曰后諸侯曰夫人大夫曰孺人士曰婦人庶
人曰妻

註云后之言後也夫之言扶孺之言屬婦之言服妻

之言齊也疏云自此至曰某論天子以下妃妾及
臣子稱謂之法妃配也諸侯以下通有妃義故以妃
字冠之特牲少牢是大夫士禮皆云某妃配某氏尊
卑通稱也后君也明配至尊爲海內小君夫人之名
唯諸侯得稱孺言其爲親屬婦言服事其夫婦號亦
上下通稱故春秋逆婦姜於齊是諸侯亦呼婦也穀
梁傳云言婦有姑之辭服事舅姑故通名婦庶人賤
無別稱判合齊體而已通言之則上下通曰妻嚴
陵方氏云婦以事人士亦以事人爲事故其妃名以
婦人庶人曰妻妻有二義與夫齊而莫之勝者妻之
道也承夫而在下者妻之位也前言天子有妻則以

天子之尊而妻之所當承者也此言庶人曰妻則以庶人之卑而妻得與之齊故也位以大爲貴故天子之妻名之以其位道無乎不在故庶人之妻名之以其道亦各有所當而已 烏程韓氏云此正天下之婦之名應在天子有后前偏插在此遙繫上文下爲夫人作領袖

公侯有夫人有世婦有妻有妾

註云公侯貶於天子無后與嬪去上中也 疏云言公侯舉其上者餘從可知 吳江徐氏云上文五者通於天下然上常得以兼乎下故雖天子有妻下不得以兼乎上故雖公侯亦自夫人始不得立后也諸